



8

T154/4434

Harvard College Library Imaging Services <http://imaging.harvard.edu>

| CM | 0 | 1 | 2 | 3 | 4 | 5 | 6 | 7 | 8 | 9 | 10 | 11 | 12 | 13 | 14 | 15 | 16 | 17 |
|------------|----------|----------|-----------|-----------|-----------|----------|-----------|-----------|----------|-----------|-----------|------------|----|----|----|----|----|----|
| Lab D50 2' | 95/0/2 | 81/0/0 | 66/0/0 | 51/0/1 | 35/0/0 | 20/0/0 | 29/19/-54 | 55/-39/33 | 42/57/29 | 82/4/79 | 51/50/-13 | 50/-28/-29 | | | | | | |
| | 38/14/16 | 66/16/18 | 50/-5/-22 | 43/-14/21 | 55/-9/-25 | 71/-32/0 | 62/34/60 | 40/9/-43 | 52/48/17 | 31/21/-21 | 72/-23/57 | 73/19/68 | | | | | | |





CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
SEP 25 1950

御覽經史講義卷七

周易

初九利用爲大作元吉无咎

哈佛大學漢和
圖書館珍藏印

編修 臣 徐瑋

朱子本義曰初雖居下然當益下之時受上之
益者也不可徒然無所報效故利用爲大作必
元吉然後得无咎

臣謹按聖人此辭所以明臣職之不易盡也人
主設官分職爵祿以馭其富貴非徒以寵榮乎
臣蓋將責其宜猷効力分一人之憂而任天下

之重也人臣委身事主教養而荷其生成非徒以邀利於君亦將期於竭才盡智上之有補於國計下之有裨於民生也初居下臣道也既受上之益使其無所報效則是苟焉食祿而孔子所謂邦有道穀者也烏可哉夫人臣所患者莫大乎退避以爲智與苟且以塞責退避以爲智則將毋動爲大而因循之弊生苟且以塞責則徒綜核細務而遠大之謀失故必有鞠躬盡瘁之節蹇蹇匪躬之心而後可以任艱鉅而不辭此利用爲大作也然有不任事之患有過於喜

事之患或就一己之所見未嘗博諮廣詢執意行之而後不勝其弊者矣或乘一時之銳氣未嘗慎始慮終率意爲之而後不勝其悔者矣才高而慮疎則不可以集事志大而識闇則不可與圖成變法以救弊而弊乃甚於不變之初動衆以邀功而功卒墮於妄動之後故力圖振作而無補於時一意擔當而卒以爲罪彼其心縱無他無如術已不善豈非作事之難而不可不謀其至當哉夫舉事一不當悔已莫及或者乃又不咎其慮之不詳顧鑒於任事之害因之懲

羹吹齋因噎廢食則又一切不敢有所舉行相率至於玩愒廢弛斯愈過矣所以聖人又鄭重以戒曰必元吉然後无咎也蓋既恐人之畏事又恐人之輕事畏事則誰爲任事之人輕事則必有僨事之患聖人爲人臣慮至深遠矣大凡純臣不敢不以身任事而亦不敢輕試而漫嘗有所作爲必思其初焉思其終焉周詳慎重灼見其當行而吾行之又可以盡善無弊然後以其嘉謀嘉猷入告於我后而以身任其成此所以一事之舉一政之行當時之家國天下被

其麻百世之子孫黎民蒙其福其爲益也大矣然聖人猶僅以无咎予之未嘗有侈辭焉則又以見純臣之心功名有不敢居祇期夙夜無過而人臣之道職業實未易盡庶免負職之愆已耳蓋臣與子一理程子論曾子曰人子之身所能爲者皆所當爲無過分之事也論周公曰周公之功固大矣然皆臣子之分所當爲夫以曾子之事親周公之事君僅得無歉於臣與子之分而已此元吉无咎之義也聖人蓋將以訓萬世之常道也

此書之旨也
公而曰此天之所啓也聖人蓋欲以爲高
千之也聖人之心也
公之也聖人之心也
論語昔者聖人嘗曰
以貝也
其利百也

周易

九五有孚惠心勿問元吉有孚惠我德

檢討臣郭肇鏞

臣謹按聖人之治天下也周浹旁皇之政總根
乎至誠惻怛之心故給求養欲任夫殊俗異黨
靡不倦倦焉曲暢其覆露之仁而一時之含甘
吮滋者亦遂霑濡渥恩被服醲化各履天地生
成之感蓋其自上下下無非真意之纏綿所爲
統輯羣生馴致於仁洽道豐之懿軌也如益之
九五以剛健中正而居尊位豈非天下之所依

庇者哉顧下之待益於上者唯惠上之裨益於下者唯心非謂心遂足以惠物也思艱圖易召好去惡利用阜財以及化民成俗皆確有加惠斯人之處豈僅僅焉仁心爲質而遽云其益無方乎特是心流爲惠而德施以溥惠本於心而利濟乃真則有孚尚矣夫君民之分遼濶不可以道路計堂中遠於千里而垓埏無論也然其苑枯忻戚之致實與深宮之呼吸相通而往來交應故其關係爲甚鉅被之以噢咻之愛以爲是且鎮撫之可云小惠未可謂之湛恩也維聖

人仰體乎上天立民司牧之意仁不異遠義不辭難昕夕思維務使天下各得其所人情莫不欲安信能扶而不危焉人情莫不欲富信能厚而不困焉人情莫不欲逸信能節其力而不盡焉內自郊圻以及山陬海澨肫然如一體之相關一切頒法樹司各極委曲綢繆以將其易直子諒之愴蓋其勤恤民隱者可謂誠而施德於下者亦已摯矣夫如是上焉雲布而雨施下焉淪肌而浹髓登諸仁讓之域納於福祿之林豐靖之庥形爲嘉頌太平之澤播在人謠真覺雲

潤星暉未足以爲瑞年祥歲德未足以爲奇也
以此言吉吉孰有大於此者乎卽以此言益益
孰有大於此者乎且夫上之勤勤懇懇以嘉與
斯民者原求孚於心而未嘗求孚於衆也然滋
液滲漉旣有以洽乎羣黎百姓之心斯蹈德咏
仁頓覺天懷中發而不可已感之者切應之者
誠至於六合同風九州共貫論治者以爲昇平
之極則焉抑知皆緣有孚之心足以深入之而
後民懷其惠哉蓋上出之爲惠者下被之卽爲
德下被之爲德者上視之卽爲益而要必設誠
於內以致行之斯措注有本天德王道相爲表
裏於益之九五一爻可以觀矣

其以遊於之謂也其言本天德王德則其表

周易

有孚惠心勿問元吉

監察御史

臣

張湄

程子曰人君居得致之位操可致之權苟至誠
益於天下天下受其大福其元吉不假言也

臣謹按從來人君御宇未有不知以惠民爲政
者也顧同一政也自古帝王出之則爲良法爲
美意歷久遠而遺愛靡窮而自後世行之則第
見其爲文具爲粉飾爲循奉故事不足言政而
并不得稱惠者豈其設施制度有不逮於前人

御覽經史講義 卷七
哉夫亦別之於其心而已矣書曰大哉王言一
哉王心詩云單厥心肆其靖之心者萬事所從
出之原而實萬民所共見之地也此心一有未
慊民知之我無以對民民卽不知之我更無以
對已故王者不難杜天下之疑而難於考一心
之信亦以百年之治亂止爭此幾希一日之張
弛卽分乎王霸倘不求諸本原之地雖日從事
於惠民無論美言小數但可謂之口惠卽散財
發粟家賜而人益之詎得謂之惠心乎哉惠心
者不務於外而孚以中不結於人而孚於天蓋

本其欲立欲達之懷以副乎同胞同與之量視
國計一如家事視民瘼皆爲己辜興利除害切
求之卽吾心閑邪存誠之功易俗移風實體之
卽吾心遷善改過之道如此則可爲有孚之至
矣孔子所謂行之以忠董子所謂設誠致行其
不以是哉夫至誠動物至誠感神德惟一則動
罔不吉元吉之應理有固然然而勿問焉勿問
也者猶云不言及之也乾始以美利利天下而
不言所利人君因民之所利以爲惠而可言吉
乎苟一言及於吉微特計功謀利之私貳於其

心不可以臻純王之治且恐諧媚之徒窺竊意
旨巧爲逢迎其始不過爲潤色鴻業黼黻太平
而其漸至於指災以爲瑞掩敗以爲功匿凶以
爲稔飾危以爲安則積僞之失較深於積惡徇
名之弊更甚於徇私將使君門萬里化不下究
而閭閻疾苦壅於上聞其得蒙仁主之惠者復
有幾人哉由此論之君人者欲以實心行實政
旣自盡其心尤賴臣下共盡其心漢宣帝有言
曰庶民所以安其田里而無歎息愁恨之聲者
政平訟理也與我共此者其惟良二千石乎是

則惠民者君也推君之惠而澤乎民者臣也蓋
必上下咸有一德斯朝野可以交孚所謂有君
有臣而後政無不舉矣洵乎知人則哲安民則
惠惠必由於能哲安民必本乎知人也

周易

彖曰夬夬也剛決柔也健而說決而和

監察御史 臣 李賢經

何氏楷曰君子以天下萬物爲一體如陽德之無所不及其於小人未嘗仇視而物畜之也惟獨恐其剝陽以爲世道累則不容於不去耳而矜惜之意未嘗不存此和意也

臣謹按君子與小人勢不並立何也君子者天地之心國家之幹祖宗之所培養山川之所孕毓而朝野之所歸望者也彼小人以其委蛇之

才容悅之情險巖忍刻猜嫌疑忌之心妨賢妬能貪權固寵之術其不能與君子共處也逐之必先其位之卑者而漸而及夫有事任者焉又漸而及夫中處者漸而及夫近君者以至衆所歸望之君子皆逐之不遺餘力則其剝陽以爲世道累其禍不可勝言矣惟君子循理順應不涉以私而亦不參以成見不惡而嚴而卒不致受怨而觸禍彼雖出於險巖而我仍歸於和平君子之待小人如是而已若夫五陽一陰則陰消陽長君子衆小人獨矣然一陰未去猶足爲

君子之憂剛之決柔所不容已也顧其勢雖足以去小人而其心未嘗不存夫矜惜惟汲引善類以充乎其位同心協力不尚威以取勝而小人自無所托足於其間所以然者君子之決小人其心同而其力不盡同也或憤激位卑而勢不相敵或才短力絀而因人以成事或義形於色不協衆力而反蒙其害要無論其位之崇卑力之大小果其心與吾同則皆引而進之集思廣益相爲贊理協恭和衷而不仁自遠斯爲剛決柔之道也與若夫爲兼容之說者以爲君子

御覽經史講義 卷一
小人不妨並用夫邪正不兩立自古未有小人在位而君子能立於朝者也書曰勿以儉人其惟吉士詩曰無縱詭隨以謹無良小人之不可不去也如此君子所以當陰消陽長之時而戒謹恐懼之念無時而不存也

周易

彖曰萃聚也順以說剛中而應故聚也

檢討臣唐進賢

程子曰萃之義聚也上說而下順爲上以說道使民而順於人心下說上之政令而順從於上既上下順說又陽剛處中正之位而下有應助如此故能聚也

臣謹按君民之分上下懸殊而君順以令民民說以從君則分雖殊而情實親君臣之位尊卑遙隔而君剛中以待下臣虛懷以應上則位雖

隔而志潛通於此可以想見聖明之世朝野一體主臣一心太和洋溢氣象順之實何如人主代天子民凡立綱陳紀無非爲天地立心爲生民立命如休養生息是民之所好也君則順其所好而體恤之無不周饑寒困苦是民之所惡也君則順其所惡而拯救之無不至又如修六禮以節民性齊八政以防民淫有不率則移左移右再不變則移郊移遂亦若大不順乎民而究不害其爲順蓋所謂順者協乎天理之當然合乎民心所不言而同然非可曲徇人情違道

以干譽也是以朝廷出一令則手舞足蹈而傳誦之不衰行一事則巷祝衢歌而感激之不置惟正之供未嘗不用其財而輸將恐後公旬有役未嘗不勞其力而予來趨事以此思說說可知矣剛中之實何如人主出震乘乾惟剛則全乎天德而克肩夫重任惟中則止於至善而不卽於偏倚且剛以立中之體而事至觀理物來揆則又不失於優柔中以制剛之過而能斷大事能決大疑又不致於壯往夫極建於上斯效徵於下蓋君之於臣如天君之令百體如乾坤

之統六子而剛中之主尤足發人生成之感而
動人則傲之思其明作有功也所以應勵精圖
治之心其偏黨不形也所以應蕩平正直之化
斯固動以天而不自知根於性而不容已不特
爲利祿而來者難及其忠愛之誠卽切功名之
志者亦無與於泰交之盛以此言應應斯誠矣
夫順以說則民聚於野盡天地之覆載日月之
照臨凡食王之粟踐王之土者莫不尊之爲元
后親之爲父母所謂民爲邦本本固邦寧者此
也剛中而應則臣聚於朝三公論道以經邦六

卿分職以率屬下至疏附後先奔走禦侮之倫
亦莫不師師而濟濟所謂天地交而萬物通上
下交而其志同者此也究之順自有以致民之
說而上初無心於市恩剛中自有以致臣之應
而上并不以此責報此純王之治所以異於霸
者驩虞之政權術之爲也哉

（此處為多欄空白或極淡文字，內容不可辨）

周易

象曰地中生木升君子以順德積小以高大

給事中臣陸尹耀

胡氏炳文曰木之生也一日不長則枯德之進也一息不慎則退必念念謹審事事謹審其德積小高大當如木之升矣

臣謹按卦體坤土居上巽木居下木性上騰得土而達雖尚在地中未遽暢遂而苞蘖既具有漸次增長之勢升象也君子觀此知德修於身猶木附於地其蓄之未醇懋則質弱而難堅其

持之不審固則根浮而易拔漸致若勾萌而輕
棄成鹵莽雖得猶勿得也故事有取乎積而道
則從其慎焉慎之云者非特葆厥已然也有加
勉於未然者矣亦非僅希其適然也有實計其
必然者矣嘗觀嘉植之遂其生也得泉土之潤
沃而起藉雨露之滋息而成當其始苞必晷以
日鼓以雷而後機勃發於惡可已泊乎方穉必
疏其畦厚其糞而後氣完固而不可撓由是得
寸則寸也得尺則尺也至於尋丈之勢具而天
人之交致已非一日矣一木之不終枯萎其不

容有所摧折掩抑猶如此何況德之在人尤爲
難率從善如登從惡如崩往往有閱終身之層
累而卒虧於一日之頽隳者苟非格物致知先
有以明其指誠意正心預有以立其閑統瞬息
爲存養以大擴其不疚無惡之天合隱微爲省
察以密持於暗長潛滋之地當無由自微之著
由勉幾安奮剛毅以任重道遠本篤實爲輝光
日新也此積小高大必權輿於一慎而胡氏所
由推而極之念念事事間以爲無不宜然者乎
特是慎德固作聖之基而千古之言王道者未

嘗不本諸聖功易爲君子謀雖不專責之王者而六爻之位遇五爲君則此象之辭在人主玩之亦自至關切要惟慎之之法微有不同所謂夙夜基命宥密是也誠能專力乎此則矩在心爲至小絜之天下爲甚大由是天人交屬人土財用無待計較而罔不畢致其崇高之象又何異榛楛樸械之濟濟芄芄與

周易

象曰巽乎水而上水井井養而不窮也

檢討臣韓彥曾

鄭康成曰坎水巽木桔槔也桔槔引瓶下入泉口汲水而出井之象也

程子曰木承水而上之乃器汲水而出井之象君子觀井之象法井之德以勞徠其民而勸勉以相助之道也

臣謹按井養不窮之義可供鑿飲之用并可助耕食之資蓋三代井田溝洫咸備八尺四尺具

有成法所以蓄洩有賴旱潦無虞至井田廢而
溝洫湮溝洫湮而穿渠之利起而穿渠之利則
有及有不及焉非若溝洫之無不及也後世井
田不可行溝洫不可復而旱潦不可以不備竊
於井養之義而思補救之方惟井中之水每為
川澤之伏流不汲不見其盈日汲不見其損故
穿渠之益所以通天時雨澤之窮而鑿井之益
又以通河渠灌溉之窮者也惟有以通其窮而
井養于是乎不窮矣然則井之為利固盡天下
而可行乎非也嘗考史記河渠書及漢書溝洫

志皆言鑿井深者四十餘丈往往為井井下相
通行水井渠之生自此始夫關中地勢最高掘
地數仞而不及泉者有之若夫冀之河間則地
勢漸平青之歷下乃濟水伏流出沒之處竟有
掘地尺許而得水者誠得良有司巡行阡陌因
地制宜開其端而示其法由是輿情踴躍督課
無煩田主或願出其財佃民或願出其力將見
一井之水上者可溉田十數畝下者可溉田四
五畝豐歲可望倍收歉歲亦可望薄收以此類
推其益亦無筭蓋施之土高水深之處則難為

力施之平行疎曠之處則易爲功此勢所固然者也且夫流之伏者不免有驟發之慮果其多爲浚井壅者開之藏者出之則水之伏而爲害者轉收之而爲利費省而功倍所爲以君養民使民相養者胥于是乎在勞民勸相之道得井養不窮之義著此井之上六所以云井收勿幕有孚元吉也昔黃帝見百物始穿井而黃帝之井田亦畫井字之形但中一區開井外八區爲田非井九百畝中爲公田也浚井溉田之說豈自後世始哉

周易

木上有水井君子以勞民勸相

侍讀 臣 林蒲封

朱子曰木上有水津潤上行井之象也勞民者以君養民勸相者使民相養皆取井養之義

臣謹按此釋井之大象取井養之義以示人君養民之法則也卦體巽下坎上坎爲水巽爲木鄭氏康成曰坎水也巽木桔槔也桔槔引瓶入井汲水而出爲井之象此以桔槔爲木器而釋木上有水之說也朱子語類云木上有水井說

者以爲木是汲器則後面却有瓶瓶自是瓦器不若只說水之津潤上行至木之杪便是井水上行之象又云草木之生津潤皆上行直至樹末便是木上有水之義是又專取水之上行以釋井義與鄭說雖似小異而意實相同也程傳曰木承水而上之乃器汲水而出井之象君子觀井之象法井之德以勞徠其民而勸勉以相助之道李氏心傳曰勸相卽相友相助相扶持之意與程子勞徠勸勉之說正相發明以見人君之養民者不窮亦猶井之養民者不窮也夫

以四海之大兆民之衆莫不待養於君使必盡人而籌之分財而給之其勢必有所不能古之聖王所以上規天時下盡地利制田里教樹畜使之出入相友守望相助睦婣任卹有無相通以民之手足謀民之室家以民之盈虛濟民之緩急因所利而利之上不費而下易行至於樂利成風化行俗厚而教卽寓於養之中矣此勞民勸相王道所爲易易也雖然井固所以養人然以一井而養天下則不足以天下之井而養天下則有餘亦猶四海之大兆民之衆不能不

藉於分猷宣力之人凡牧民之吏皆有養民之責者也使爲吏者觀法於井志在養民不以簿書期會爲急不以趨承巧進爲能惟務政平訟理與民休息復以暇日周歷田間勸課農桑察其勤惰籌其緩急而勞徠勸勉之不惟其文而惟其實則慈惠之師人被其澤民氣和樂康阜日登於以庶幾循良之績而成熙皞之風者不外於勞民勸相而得之井養之義不誠大哉

周易

上六井收勿幕有孚元吉

侍讀臣彭樹葵

朱子本義曰收汲取也幕覆蔽也有孚謂其出有源而不窮也井以上出爲功而坎口不掩故其象如此

程氏傳曰井以上出爲用居井之上井道之成也取而不蔽其利無窮井之施廣矣大矣有孚有常而不變也博施而有常大善之吉也

鄭康成曰井以汲人水無空竭猶人君以政教

御覽經史詩義 卷一
養天下惠澤無窮也

臣謹按井之取象以其上水井之爲用取其養人故彖傳釋以養而不窮象傳推之勞民勸相而其義則莫著於上六一爻蓋下三爻在井之下未能致上水之功四五兩爻雖已近乎上而猶未離乎中故僅言井之發泉之冽而未及汲取以致用至上六居井之極水已出井則上水養人之功於是乎可明著其利澤而普惠於無窮故爻辭繫之曰井收勿幕有孚元吉夫收之爲言孔氏以爲收成之意其義未顯故朱子直

訓爲汲取蓋至是而三之所爲渫五之所爲冽者俱得出乎井以致用於天下而可供日用可薦明堂其爲利不亦溥哉顧井之卦德取其養而不窮其在彖曰无喪无得蓋言井之受汲多亦不減少亦不盈歷久而不變也曰往來井井蓋言井之廣被無間乎往來不分乎遐邇使人各愜所欲也故程子以爲无喪无得則其德也常往來井井則其用也周夫所謂周與常者是卽勿幕之象有孚之義也勿幕而後井之汲取不爲限量其共井而汲者無彼此其環井而汲

者無方所於此想見廓然大公之心與覆載同其氣象焉有孚而後井收之勿幕初無間斷其勿幕於一人者推之千萬人而無不然其勿幕於一時者推之千萬年而無不然於此想見至誠無息之量與日月並其升恒焉如是而有不大善而吉者哉臣竊以此推之政治而思王者以萬物爲一體四海爲一家凡遐荒之衆血氣之倫必將有以洞燭其幽隱而普被其膏澤是非勿幕之道乎王者法制所及經畫所周以一日二日之兢業而裕千秋百世之樂利是非有孚之道乎則以是而揆之豕傳所云養而不窮象傳所云勞民勸相以及鄭氏所云人君以政教養天下而惠澤無窮者其義無不脗合而條貫矣

周易

上六井收勿幕有孚元吉

監察御史臣倪國瓊

程子曰井以上出為用居井之上井道之成也
收汲取也幕蔽覆也取而不蔽其利无窮井之
施廣矣大矣有孚有常而不變也博施而有常
大善之吉也

臣謹按此言井道之大成德施普而實意周也
卦本以巽木入坎水之下而上出其水源深體
裕本足以周斯民生養之需而上六適當坎口

不掩之處是道成於已而功遍羣生德脩於身而澤被天下仁恩遠布治化四達自畿甸以及海隅而無一物不遂其生自老幼以及鰥寡而無一人不獲其所猶井之汲取而不掩覆所謂博施濟衆井養而不窮者惟此足以當之然豈惟爲是市恩見德而不本之一心之誠哉夫有純王之心而後有純王之政是以主井道者淵泉之性旣純於豫養汪濊之澤亦蓄乎心源正心誠意之功素預則足民阜財之術自周故外之聖澤汪洋益以見內之仁心肫至凡其寬山

澤之禁薄關市之征公天下之利而無所私正其心之公溥者欲以涵濡乎萬物也凡其盡裁成之道竭補救之方錫天下之福而無弗徧正其心之愷惻者欲以康濟乎兆民也惟上之心篤摯而罔間上之澤自普被而不窮以此心而勞民恒產制而享樂利者及後世以此心而勸相有無通而敦仁厚者遍民間是乃所謂有孚也由是九功叙而五福歛四序正而百穀昌養道之成至此而元吉之占在是矣夫聖人以父母天下爲王道王者以萬物得所爲極功而總

不外於設誠而致行之美意良法相輔而行自然德洋恩溥中外降康仁覆天下而萬世治安此養道之所宜法井也

周易

巽而耳目聰明

中允 臣周長發

臣謹按聖人之宰物成務也以心思爲窮理之基而潛而善入斯與理相浹而無所拂以聞見爲揆幾之府而擴而日開斯應幾不滯而無所蒙凡以德之兼乎內外者內之有以立其體外之有以致其用夫固有兼備而不容缺者焉鼎卦彖傳所云巽而耳目聰明臣嘗取而繹其旨矣夫鼎以巽爲內卦是則巽順本卦德也而上

離爲目五陰爲耳耳目之官職司聰明是則巽
順在內爲心思聰明在外爲耳目皆卦象也嘗
觀鼎而知象與德之全焉蓋鼎爲天下之重器
人君以之凝承國祚統馭羣生上以紹宗祖之
基而奠苞桑於永固下以錫臣民之福而膺圖
籙於無疆其爲任亦甚重且大矣所恃者君德
有以攬其全而彙萬理於心思無微不至運萬
幾於耳目無物不周耳亦以人心之靈以思爲
職耳目之用以聰明爲職天下之理無不與心
相通又無不與耳目相準夫固盡人而有內外

之德矣况乎大君一心將舉天下而劑量焉大
君一身將盡天下而視聽焉倘入之不深而一
有所拂察之不審而一有所蒙則天下之大事
物之變其足以撼心思而引耳目者詎少哉惟
是內體以巽順爲宰沉潛之思深入乎天道之
表而以之觀理何理之不窮也深入乎人事之
中以之觀物何物之不察也外體以聰明爲用
天縱之資視惟明聽惟聰有以憲天之聰明也
明四目達四聰有以盡天下之聰明也舉凡幾
微委曲之間羣言衆議之煩爲恒情之所不及

御覽經史講義 卷七
料者一出諸悅心研慮之精自能曲暢旁通而無之或窒矣一統諸天亶元后之尊自能兼聽並觀而無之或蔽矣且也聰明而本之於巽順則聰明之用始有所主而不致馳逐於見聞巽順而濟之以聰明則巽順之體始有所擴而不致冥守夫虛寂如是則卦德既全卦象亦協主器而有以凝承乎國祚綏猷而有以統馭乎羣生柔進上行得中剛應庶幾永享元亨之吉矣

周易

艮其背不獲其身行其庭不見其人无咎

監察御史 臣 張孝捏

程傳曰人之所以不能安其止者動於欲也欲牽於前而求其止不可得也故艮之道當艮其背所見者在前而背乃背之是所不見也止於所不見則無欲以亂其心而止乃安不獲其身不見其身也謂忘我也無我則止矣不能無我無可止之道行其庭不見其人庭除之間至近也在背則雖至近不見謂不交於物也外物不

接內欲不萌如是而止乃得止之道於止爲无咎也

臣謹按天德王道不外乎脩己治人而脩己治人之要不外乎理然有時理有所不明而茫然莫得其所止則非他物蔽之卽己與人蔽之而已矣就一己而論則有人心有道心道心原於性命之正微妙而難見人心生於形氣之私危殆而不安二者雜於方寸之間而不知所以治之則遇紛華而悅見可欲而亂天理之公終無以勝夫人欲之私而一己之七情六欲紛紜擾

攘欲其審所止而止焉難已至於人則有性情嗜好之不齊愛憎向背之不一苟不免乎人之見者存則愛者無由知其惡憎者無由知其善卽使愛憎之念不設而畛域未泯則一言之發或疑其徇私一事之行或疑其利己漸至是非雜糅美惡混淆不惟無以收集思廣益之效而適足以眩惑聰明矣夫惟聖人廓然而大公物來而順應不見有物不見有我惟一理而已理之所在則剛健以行之理所不在則果斷以去之凡衆人之情僞一己之嗜慾俱不得入而撓

其所守夫是以萬事萬物處之無不各極其當
而能止於至善之極也抑又聞之聖人定之以
中正仁義而主靜止者靜之象也先儒論學謂
當看喜怒哀樂未發時氣象蓋靜中之所得既
深則動而不括自可無私心而當理矣良其背
靜也行其庭不可謂之非動而不見其人則仍
歸於靜所謂靜亦定動亦定也規規焉以絕外
誘之私則將見滅於東而生於西矣人我兩忘
如鑑之空如衡之平澄然無事泛應曲當所謂
與其非外而是內不若內外之兩忘也審是則

一理之周流得其所止脩己治人之要不外是
矣

周易

彖曰艮止也時止則止時行則行動靜不失其時其道光明

監察御史 臣 陸尹耀

張子曰艮一陽為主於兩陰之上各得其位而其勢止也易言光明者多艮之象著則明之義也

臣謹按此釋卦名止者安止之義也自人心言之止則所處皆安胸無煩擾操天命於一心合萬物爲一體其耳日常存於未始有物之初心

思常入於未始有物之內時中之體段已具於
方寸故能隨時順應有感卽通而行止動靜一
因乎時初不以有我與乎其間斯物我兩忘而
化於道矣尚安有意必固我之私障蔽其光明
哉先儒謂時止而止止也時行而行亦止也由
是思之止也者歛感於寂也行也者通寂於感
也動無紛擾精明之極變化生焉動之時也靜
無拘牽寧謐之至天君泰然靜之時也由是泰
字定而天光發特其自然之光明云爾臣愚竊
臆此彖辭意義與中庸首章大旨脗合良止之

義一不睹不聞莫見莫顯之戒懼慎獨也與時
俱止未發之中也與時偕行中節之和也動而
無動動固無爲靜而無靜靜非有執中和之極
致也光明之所暨訖其位育之全功乎自王道
而論功莫要於戒懼慎獨約之又約謹之又謹
不違乎天命之本然無拂乎吾性之自然前後
始終理之原於固有者歛之愈密亦恢之彌廣
內外本末功之盡其當然者效幾其全而詣臻
於化斯行止動靜之偕臧而治道亦於是光明
也與

周易

君子以思不出其位

編修_臣朱佩蓮

_臣謹按艮卦象辭而曾子稱之蓋平日致力於止至善知慎乃在位行無越思內可聖外可王守約施博最爲善道迺於學易時獨深其觀玩者也王弼易註曰各止其所不侵害也孔穎達易疏曰兼山艮者兩山重叠直置一山已能鎮止今兩山重叠止義彌大君子此時思慮所及不出已位也程伊川易傳曰位者所處之分也

萬事各有所得其所則止而安若當行而止當速而久或過或不及皆出位也况踰分非據乎張南軒易說曰位非獨職位大而君臣父子微而一事一物當其時與地所思止而不越皆不出其位也非有主於中其能然乎朱子論語集傳獨取范氏物各止其所而天下之理得一語可謂括羣儒精粹矣獨疑夫易无思也无爲也天下何思何慮易不言思而此獨言思思之思之鬼神通之也曾子以魯得之力行工夫居多而此獨取思知止得止勿慮胡獲也易曰以

思曾子直曰思而位之當不當不待觀象而已思過半矣蓋此章與中庸素位章有別素者因其本然思者盡其當然人之不能素履往也勿思耳矣芸人田者病代匠斲者傷人已兩失何取乎爾出位之外而未必賢入位之中而反有不暇者也本分當爲之事千慮尚恐一失不曰如之何如之何吾未如之何故大而天下天下皆有位也皆當思也位在君父思止於仁慈位在子臣思止於孝敬勿敢有加損焉小而一身一身各有位也各當思也位在視聽思明聰位

在色貌思溫恭位在言事思忠敬勿敢有迎距
焉曾子由忠恕而悟一貫則易之爲君子謀者
蓋隨事精察而力行之宜有味其言之與乃若
艮之取象則更有說艮與咸皆取象人身咸感
而動身之所動由足而動故自拇而腓而股而
思而脢而輔頰舌皆自下而上而思爲之運若
朋從爾思則膠擾妄動之思非所以思矣艮寂
而止身之所止由足而止故自趾而腓而限夤
與心而身而輔亦自下而上而心爲之主若危
薰其心則強制不動之心尤非所以思矣膠擾

妄動非吉也強制不動亦非吉也咸之吉在六
二之能居順不害也艮之吉在上九之能敦以
厚終也君子通微之思亦在乎順之厚之而已
項氏安世以爲思不出位唯上九一爻可以當
之則篤厚意尤爲深切氣不翕聚則無以發散
物未堅實則無以復種而生未有不能成終而
能成始者也卽靜極復動之道貞下起元之理
周子曰艮其背背非見也靜則止止非爲也故
聖人定之以中正仁義而主靜立人極焉此則
思之極致也夫

聖人欲之以中五...
 風于曰及其背背...
 時未...
 未...
 之...
 原...
 原...
 二...
 交...

周易

六二鴻漸于磐飲食衎衎吉象曰飲食衎衎不素飽也

檢討臣雙頂

臣謹按班聯有人材然後政事有綱紀盛世之
 高爵厚祿非體貌之而以爲名也非假借之而
 以爲文也退食自公而分量有歉其心以爲負
 國之甚寤寐何以自安是故人材爲政事所荷
 持政事爲名誼所繫屬亦求其心之有所安而
 已漸之取象於鴻也以其進之有漸初六始進

於下未得所安而上復無應六二柔順中正進
於磐而益安而上有九五之應矣飲食衎衎卜
云其吉雖然詎易得此漸磐之衎衎哉天下境
之所懸必有物以充塞於其內而物之自適乃
隨境以和樂於其中此固非偶然之遭逢而其
交相資者乃不可以相易則觀於物情而愈可
以勵臣節矣聖主之得賢臣也推誠布公視臣
鄰如一體敕幾宣訓孚寮案於一心由是用其
身者必恤其家酬其庸者必重其祿黼黻太平
遭逢明盛席豐履厚俯仰無虞安之至也而人

臣之不敢以俄頃卽安者乃正在此矣才竭力
殫其無餘也而自謂無餘之處卽已留其有餘
謨明弼諧其有意也而偶不經意之時卽至流
爲任意方物出謀國是可存也而隱忍不發此
生之碌碌何爲省成慎憲和衷可美也而矯強
立名偏執之成心何補如是而人臣何以獲安
於俄頃乎而不知俄頃之不敢安者卽汝止之
所以安也從來素絲之委蛇常在旦明之屋漏
事聖主者運之隆呼蓋臣者任之大聖憲天而
臣欽若者一德一心之相與以有成由是拜自

獻其身而無所私隨在敬其事而無所失有時
伸一已之獨是而非以立異有時從天下之公
是而非以黨同聖人之所謂不素飽者於不敢
安而得所安蓋精氣融而形神固斯品節著而
境地宜也要必旰食宵衣上有憂勤之主斯靖
共夙夜下有贊襄之臣人材蔚起綱紀畢張明
良合德於堂廉則四海著清寧之化年豐物阜
而飲和食德者永沾樂利於無窮矣

周易

上九鴻漸于陸其羽可用爲儀吉

監察御史 臣 沈懋華

王弼注曰進處高潔不累於位无物可以屈其
心而亂其志峨峨清遠儀可貴也

程傳曰安定胡公以陸爲達達雲路也上九在
至高之位又益上進是出乎位之外於漸之時
居巽之極如鴻之離所止而飛於雲空在人則
超逸乎常事之外者也進至於是而不失其漸
賢達之高致也

朱子本義曰儀羽旄旌纛之飾也出乎人位之外而其羽毛可用以爲儀飾蓋雖極高而不爲無用之象

臣謹按漸之六爻皆取象於鴻蓋凡鳥之行以序而有漸者唯鴻鴻之進退有禮志義皎然妻道也亦臣道也乃上九一爻無取乎歸與進之義而以無所應爲宜聖人以爲此高世之士則然故就卦位言之以陽剛而居衆爻之上不因人爲進退而飄然有遐舉之思不隨世以就功名而迨然有離立之想蓋在家爲保姆在國爲

黎老高蹈遠引殆超乎人位之外者與然竊思之政治之成在乎上而風俗之善卽不當位者亦與有責焉曰漸于達者象其高也用其羽者昭其則也當其養德於潛而樹中朝之雅望樂道於野而立明時之標準以一身之輕而維一代之風節以一人之退而振一世之人心所係詎淺鮮哉聖王之世戴高而履厚無一人一物之不在宥者至漸之時鴻飛冥冥固哲人之高致而風厲有位尤達士之芳軌天下詎有聖化之外之人哉抑詎有賢人君子而不以輔聖化

者哉身名隱約而鼓吹休明居處高潔而儀型
百代可慕而不可即也可親而不可褻也彼夫
鶴鳴之彥或蘊風烈而不舒維鷦之流或望精
光而不副固不可同年而語矣或者曰鴻不見
用徒以羽為人所儀鴻之蹇也又曰羽者鴻之
外也外之文不若內之文也不用其內而用其
外非鴻之幸也而抑知不然鴻有永貞之節因
其羽而知其德翔於千仞而不下下則為王者
之瑞焉曰儀者猶鳳凰之來儀也賓於天子優
禮之以為國之光華天下仰其風采俗尚日以

端人心日以古無形之文大用出焉爵祿不足
以動其心而久居賢德以善俗大象之所云此
物此志也中孚之翰音登於天不若鴻漸之羽
儀而吉蓋君子小人之判也

周易

豐亨王假之勿憂宜日中

侍讀學士臣程景伊

朱子曰豐大也以明而動盛大之勢也故其占
有亨道焉然王者至此盛極當衰則又有憂道
焉聖人以為徒憂無益但能守常不至於過盛
則可矣故戒以勿憂宜日中也

臣謹按震上離下其卦為豐豐者盛也大也明
以制動動以用明則大業可興而極其盛大矣
夫當盛大之時天下一統治化四訖此其所以

亨也雖然消息盈虛相爲倚伏治亂之道如環無端竊嘗覽觀前史每見自古國家奕葉承平疆圉開闢兵刑不作民物繁昌盈廷拜手以頌昇平舉世謳歌而享康樂宜若無意外之虞者乃未幾而蘖芽之釁卽潛伏於其中何者無平不陂無往不復其所以名亨者卽其所以可憂也聖人於此宜危言示悚乃曰勿憂宜日中何哉蓋久安長治不在乎徒存恐懼之心而在乎亟講持盈之道豈曰委心任運哉惟聖人能以無逸之心行有常之政廟堂之上百度修明燦

然具舉自圖治之初迄於致治之日一以貫之譬則曦御當空萬形畢照是則所謂宜日中者而所以保有其豐道在是矣其見於唐虞之時則兢兢業業一日二日萬幾罔失法度罔遊於逸罔淫於樂是也其見於成周之時則制治於未亂保邦於未危是也此皆所謂宜日中之道也然考之古註言大而亨者王之所至財多德大非王者之德不能至之又言豐之爲言闡宏微細通夫幽滯者也爲天下之主而令微隱者不亨憂未已也故至豐亨乃得勿憂用夫豐亨

不憂之德宜處天中以徧照者也故曰宜日中
果若斯言則類於後世恢張侈大之說於經文
本旨失之遠矣自朱子之論出然後聖人憂世
立戒之意灼然彰著於簡冊而萬世帝王保泰
之金鑑不外此焉然則欲求永豐之術亦轉思
致豐之道而已矣

周易

豐亨王假之勿憂宜日中

編修_臣林蒲封

程子曰豐為盛大其義自亨極天下之光大者
唯王者能至之假至也豐之時人民之繁庶事
物之殷盛治之豈易周宜如日中之盛明廣照
无所不及然後无憂也

_臣謹按聖人作易所以闡天人之理而昭治亂
之原其憂患後世之心甚深且遠如乾之終日
乾乾夕惕若泰之艱貞无咎大有之艱則无咎

御覽經史講義 卷一
既濟之思患而豫防蓋皆居安思危示人以保
泰持盈之道也而其辭之深切著明者尤莫如
豐卦焉先儒以爲豐卦離明在內有見大之智
震動於外有圖大之才明動相資勵精圖治何
事不立何功不成天位之尊四海之富羣生之
衆王道之大豐亨之象其唯王者乎然而聖人
之憂自此始矣夫天下之治不生於四方寧謐
之日而常基於艱難締造之時亂不始於羣生
板蕩之秋而常伏於宴安逸樂之際歷觀前世
創造之初經營勤苦以致清平迨至積安日久

外無兵戈之擾內無水旱之災海宇乂安民物
殷庶問其地利則田疇非不盡闢也問其物產
則技巧非不畢陳也問其詔令則堯舜之典謨
也問其典章則成周之禮樂也政教賞罰無一
事之不全聲明文物無毫釐之不備一若朝廷
之上無過之可稱無失之可指無偏之可矯無
闕之可修從容清晏文恬武嬉方以爲可以久
安長治萬世無患也於是乎驕惰之心生驕者
玩兵黷武窮泰極侈人心解體馴至亂階秦隋
之季是也惰者沈酣宴安慮不及遠善惡混淆

迄於不振漢唐之季是也是以當禍亂既成之後竭天下之才智救之而不足而於太平無事之日以人主之一心持之而有餘所以古之聖王凜天命之靡常察盈虛之遞運治安已致愈切憂危卑宮惡服慮侈汰也不遑暇食防逸豫也慄慄危懼戒驕溢也動守憲度虞禍亂也不爲嗜欲則娛樂之言無自進不好功利則興作之計無自生信賞必罰誰敢矯誣兼聽並觀誰能壅蔽健行不息如皎日之中天無倚無偏使文明之常晝日中之象此其至乎虞書有曰兢

兢業業一日二日萬幾又曰敕天之命惟時惟幾蓋言治亂之介於幾微也夏書曰予臨兆民凜乎若朽索之馭六馬商頌曰不僭不濫不敢怠遑周書曰心之憂危若蹈虎尾涉于春冰周官曰若昔大猷制治于未亂保邦于未危皆言治安之不可恃而憂虞之不可忘也周之積仁累善至成王之時爲極盛矣而召公作誥猶諄諄以祈天永命爲言後世之稱致治者莫如漢文帝唐太宗而賈誼以爲積薪厝火至爲流涕太息魏徵十漸疏動色相戒惟慮不克厥終蓋

履極盛之勢而動之以戒懼處至治之時而保之以祇慎者自唐虞三代而下聖君令辟莫不同然是豈好勞而惡逸哉凡以廣太平之祚保豐盛之基使休光美實日新歲益熙熙皞皞循之無窮至千萬世永有法則也然臣嘗卽卦象而推之程子所云盛明廣照无所不及者蓋卽堯之光被四表孟子所謂上下與天地同流以釋日中之說其義大矣而於聖人垂象著戒之意猶有所未盡焉蓋治極則亂盛極則衰氣數循環不可不慎故彖傳曰日中則昃月盈則食

天地盈虛與時消息言王者履豐之盛如日之中尤宜制節謹度修人事以挽天時守謙集益建極執中憂天下之憂故能樂天下之樂至於德備諸已而福集厥躬賴及四方而慶流萬世皆不外於日中之義推而致之臣愚以爲保泰持盈之道其深切著明莫如豐卦者此也

[Faint bleed-through text from the reverse side of the page]

周易

重巽以申命

給事中 臣 倪國璉

程子曰重巽者上下皆巽上順道以出命下奉命而順從上下皆順重巽之象也君子體重巽之義以申復其命令申重複也丁寧之謂也

臣謹按巽之取象在天為風在朝廷為命令風之吹物無處不入無物不鼓動詔令之感人淪肌浹髓亦如風之動物無不至也蓋以天下之廣萬民之多欲其一一咸喻主志去其不善而

御覽經史講義 卷一
咸歸於善非命令無以爲功與有命令之象王者之彛訓本乎皇極垂爲典謨渙汗之頒隨風而布其視天下之人猶一家之人則不可不家諭而戶曉古者布之始和懸之月吉常不憚反復丁寧使中外臣民咸喻厥旨而曉然於仁育義正之王心故民雖至愚至賤而王者不敢以愚賤忽之凡有所期會約束訓諭誥誥誠旣順乎人心之所同尤察乎人情之至隱旣熟習乎耳目之間而不駭其聽聞尤深愜其寤寐之中而咸孚其志氣此所以往復開導至再至三亮天

之工卽代天之言布天之化卽象天之聲和風之所鼓盪宣暢鬱結而無所滯善言之所牖迪感發深隱而無不通夫豈徒事文告哉有不得已於言者則委曲詳盡皆仁心之流露雖諄復而不覺其煩有不敢略於辭者則提撕警覺皆教思之无穷故輯懌而彌形其暢是以敷揚天命敬述祖訓出如綸綍致慎樞機王者本不輕於言而旣出之爲命又重以申之所以法巽之無乎不入而上情旣達下意卽罔不孚也考之周禮道人以徇道路揮人以誦王志蓋風告四

方宣通德意自古志之此欽承聖人之言者乃無不如風草之偃也由是道德以一風俗以同所謂令出惟行而聲教無不暨訖者蓋取諸吳有如此

周易

象曰隨風巽君子以申命行事

編修 臣 張若需

程子曰兩風相重隨風也隨相繼之義君子觀重巽相繼以順之象而以申命令行政事上順下而出之下順上而從之上下皆順重巽之義也命令政事順理則合民心而民順從矣

臣 謹按人君法天出治有怙冒天下之量即有鼓舞天下之權薄海之廣兆人之眾所以一其心思牖其耳目俾相安於禮樂政刑之內而罔

有拂戾者固由於沐浴陶淑之甚深實則命令之頒感人爲獨切而率民以易從也是故虞廷命官不廢疇咨之義成周布政式垂象魏之文帝王致治固在躬行然亦何嘗薄誥諭爲虛文而顧崇清淨無爲之化乎夫法教百端令行爲上所謂堅如金石信如四時無私如天地者凡以示其事之必可行而先爲丁寧告戒之也小民至愚難於慮始國家興大利除大害將舉一世而轉移之使不爲之反覆開陳堅明約束將利於千萬世者或不利於目前利於千萬人者

或不利於數人必且多方以相撓展轉以相遁使德意終格而不行此英命之申所以必在未行之先有以祛其蔽而安其隱也然或詔令所布未嘗不愷惻周詳聳人觀聽而無良法善政繼其後則德音之播幾爲紙上之空言而無逮下之實事其於民生國計鮮所裨益又明矣君子觀於重巽之義而知申命者所以致其戒於行事之先而喻之以可從行事者所以踐其言於申命之後而示之以必信言行君子之樞機而立綱陳紀之間尤大彰明較著者也且夫英

之爲義取象於風風感物而易入命順民而不
違其理一也人君無一息不爲小民圖安全謀
衣食富教兼施經綸大備舉窮簷蔀屋之隱畢
籌之宵衣旰食之中然後沛然布之下其令如
流水在上旣無拂民從欲之舉斯下自昭丕應
徯志之實傳曰民之所好好之民之所惡惡之
上順下也書曰是訓是行以近天子之光天子
作民父母以爲天下王下順上也上下交相順
而政無不立法無不行天子垂衣端拱精神周
四海之遙小民樂事勸功尊親切一人之戴裳

宇之內靡然向風而蒸蒸丕變所謂大順大化
不見其迹莫知其然者聖德之神不且渾然與
天同運也哉

Blank page with vertical lines for text.

周易

象曰隨風巽君子以申命行事

編修_臣徐景熹

_臣謹按聖王治天下政事務在必行而政事之
行貴乎號令之相繼必使百官以及萬民朝宁
以及四海莫不知聖王敷治意旨之所在而後
庶績以理百務以成也如天之雨暘寒燠各著
其時唯風以兆之亦唯風以散之其象取乎頻
相加其性取乎順以入而相繼者無或息則無
物而不被其噓植矣國家之行事必先以申命

者其亦有隨風之象焉今夫隨者相繼之義也
以與之二體相成協應無已而生機所觸有以
萌發乎品彙之朕兆故河圖帝通紀曰風者天
地之使是風卽天之號令萬物得以育生而知
所仰者以其號令之頻施耳而况禮樂刑政發
於朝展堂陛之上以之渙號於天下而罔或有
違者獨無逡巡之開示乎是以聖王之設施其
敷政之美意必有以深洽於民心布化之良規
必有以深切於民隱乃體與之君子則不遽求
之民也明彛訓以示寰區雖反覆而不爲勞雖

勤宣而罔或懈委曲開導中復深寓乎愛惜憂
勤之意旣勞來以使之樂從又提撕以令其感
悟朝夕勸勉再四丁寧忠厚悱惻之深情不覺
纏綿於靡已此所以發號施令脗合民願而凡
事之欲行者無不奉命惟謹以視風之養物成
功變化成道入微以相喻唯恐其不周奏聲而
相宣復恐其或驟者有以異乎無以異乎且與
之施命其有關於文教風化不獨一卦爲然如
小畜之懿文德則風行天上者也蠱之振民育
德則山下有風者也觀之省方設教則風行地

上者也姤之施命誥四方則天下有風者也卽
漸之居德善俗鼎之正位凝命要皆不離乎巽
以取象者也古聖人出身加民天下皆知其意
之所向而積漸以共明之則順而易入矣故申
者申其意而非申以法命者命以安而非命以
強申命者所以誥誠於行事之先預酌乎人情
之順不啻三令五申至詳至悉而後見之施行
民乃卽事而深喻其意也已且行事卽以踐其
所申之命者也苟行事而不申命則民無所信
從而大業未易舉或申命而不行事則民亦無

所向風而宏猷仍未易集蓋以實效之不可不
漸臻耳書曰星有好風傳曰君子之德風風之
時義大矣哉要期乎漸以圖之順以成之而號
令必有以相繼也聖王建極萬國咸寧庶事之
康端在是與

御覽經史講義 卷七

周易

六四渙其羣元吉

中允臣彭啓豐

胡瑗曰天下之渙起於衆心乖離人自爲羣六四上承九五當濟渙之任而居陰得正下無私應是大臣秉大公之道使天下之黨盡散則天下之心不至於乖散而兼得以萃聚故得盡善元大之吉也

臣謹按渙卦自六三以上皆因渙以拯渙者六三陰柔而不中正居無位之地止於其身無悔

不能及人六四上承九五爲大臣之象居陰得正絕去黨援以柔順輔剛中可以拯天下之渙而無難程傳言天下渙散而能使之羣聚可謂大善之吉朱子謂程傳文義是羣其渙非渙其羣也蘇洵有云羣者聖人所欲渙以混一天下此可補程傳所不及蓋物以類聚之謂羣周而不比之謂渙人心之所以睽由於各挾其私不能混一惟散一己之黨卽散天下之各立爲黨者合之使天下臣鄰聚爲一心聯若股肱以効忠蓋於一人所謂散小羣以成大羣也夫朝廷

之上是非可以力爭可否期於共濟不但依附功名阿結黨援之念不可稍存卽事關國計民生之大而偶涉意見之偏不知通變以宜民卽不能實心以爲國其本在於廓然大公和衷交贊而已昔歐陽修作朋黨論謂君子有朋小人無朋而引漢唐之事以爲鑑蘇軾作續朋黨論謂君子如嘉禾封殖之甚難小人如惡草不種而自生夫小人以勢利相結納終必至於相傾軋卽負名教之尊而黨同伐異亦不可爲君子故歐蘇之說俱未得其正也且夫渙豈中立調

停漫無區別之謂哉其識足以辨賢奸而惟以
人事君其權可以進賢退不肖而惟君命爲重
靖共爾位正直是與王臣之蹇蹇匪躬相臣之
休休有容皆於渙其羣端其本矣大君虛己以
建極無作惡無作好早以離去偏私爲聯屬人
心之本用資六四與順之德成九五剛中之功
宜乎渙汗大號而幽滯皆宣也

周易

天地節而四時成節以制度不傷財不害民

監察御史 臣 陸尹耀

孔氏穎達曰天地以氣序爲節使寒暑往來各
以其序則四時功成也王者以制度爲節使用
之有道役之有時則不傷財不害民也

臣 謹按節者限而止之之義也此卦兌下坎上
坎水之流無窮兌澤之容有限以有限蓄無窮
有過溢之虞故利用節非節省之謂節乃節制
之爲節也卦體陰陽各分其半均而不偏二五

陽爻居中得位限而不過體此義以措施於政
事是操節制之權而法天象地因時制宜變化
從心權度在握制節謹度約已省躬費出有經
用財不濫無無藝之求無橫征之稅斯不致傷
財而害民矣豕辭大意如此臣愚竊臆一時有
一時之節一事有一事之節與其既溢而思所
以節之不如未溢而先有以節之也試觀天地
之運陰極陽生陽極陰生刻刻相生時時相節
故能寒暑代嬗氣序不忒而歲功於是乎成焉
然天地者不言而化無爲而成者也若聖人而

爲天子者中處天地之內凡天地之順布者固
當推行而盡利卽氣化之不齊者亦必裁成輔
相以合其宜於是法天地之節而制爲度數尊
卑有等輕重有倫上下有辨文質有宜皆所以
爲節也卽如制用一端國家之歲入有數以其
所入供其所出過豐過儉皆過也是以斟酌損
益制爲常典祭祀有常品匪頒有常式燕饗有
常儀錫予有常物蓋布帛絲粟卽閭閻生計所
聚龜貝泉刀實斯民命脉攸關苟無常經多方
以耗之將必多方以取之安保其不傷財害民

者哉故卦辭既戒以苦節之不可貞矣而此象復申其義謂當法天地之節而節以制度者蓋欲其隨時隨事而豫為節之庶多寡隆殺各中其節焉而後萬化之原以裕萬姓之命以安也象辭之言節也可謂深切著明矣

周易

節以制度不傷財不害民

檢討臣熊郢宣

邱富國曰聖人體節之義則立為制度量入為出无過取无泛用有損已益人之實而无剝下奉上之事故不傷財則不害民矣

臣謹按天生五材民並用之八政之條首惟食貨是財者生民之大命天下不可一日無者也

有財用而後民事興君職即於是乎在焉夫民不能自為治治之以君君不能自為養養之以

御覽經史講義 卷七
民原以一人利天下非以天下奉一人卽其取
諸人者還以致之人耳惟酌劑之有經斯國無
匱乏之虞下有豐裕之休矣此聖人因天時之
有節推其道於理財安民誠爲有國者之要務
也凡物必有所限始能節而制尚矣物必有所
準始能節而度昭矣制則守不易之章程而無
或過也度則循一定之規畫而無不及也過爲
奢奢不可崇也不及爲陋陋不可訓也節之以
此所以防微杜漸者不亦深且遠哉人情之易
縱也處約則斂抑是務恒存歉然不足之懷處

樂則志滿氣溢遂有不能自持之意况人君擁
四海之富居九重之尊何所求而不得何所欲
而不遂乎苟不致審於天人理欲之界以別其
途則一念之敬肆卽爲生靈之休戚所係國家
之治亂所基使發而爲道心也自檢束於義禮
之中謹性情節嗜好嚴恭於朝夕者其必量入
爲出而經費有常也其必謹小慎微而潔已厚
下也則侈泰之私何自而乘乎否則人心熾矣
聲色貨利之投無在非馳情蕩志之具宮室之
居必欲其美服飾之奉必求其華器用之供必

致其巧耳目之靡麗何窮府庫之金錢有盡所謂積之百年而不足用之一旦而無餘將度支既竭稅斂轉增勢所必至矣祇此節與不節之故始於方寸者甚微及於國計民生者甚巨得則咸足失則交困利害之相因若此能不遏其機於將萌而防其患於未著哉蓋君心爲萬化之源君身爲百度之表但使宮寢之上一興作而思物力之艱難一服食而知閭閻之疾苦不敢暴有限之財物以從欲不忍朘小民之膏脂以自便惟是省約宅衷初終弗異則乘輿服御

之有定制也宴饗錫予之有常典也土木營繕之不事珍奇玩好之不至於前也歲入之貢賦無耗蠹以時之蠲賑有儲蓄敦龐樸素之風釀爲豐稔蒸爲太和遂以養蒼生無窮之厚福培國家無疆之丕緒也孰非此能節之所致哉昔堯之茅茨土階而黎民於變禹卑宮室而績底平成卽漢之文景弛供御以便民賤珠玉而重農桑幾致刑措之休者亦節之之效也書曰慎乃儉德惟懷永圖孔子曰節用而愛人亦此意與

此處為多欄空白，僅有極淡的印文。

周易

君子以制數度議德行

庶子臣周資陳

孔穎達曰數度謂尊卑禮命之多少德行謂人
才堪任之優劣君子象節以制其禮數等差皆
使有度議人之德行任用皆使得宜

臣謹按制數度議德行帝王節天下之要道也

諸儒皆謂數度之制因其在人德行之議修其
在己獨孔穎達謂德行為議人之德行為任用
辨材論官似於議字較切且寓慎重名器愛惜

御覽經史講義 卷七
爵祿之意尤合節之本旨况君子乃以聖人在
天子之位而議禮制度以節天下者自非徒一
身之事故制數度以政事而言謂尊卑禮命之
輕重議德行以人才而言謂大小賢能之優絀
審其自然權其當然節也者人才政事之大防
也數以爲度度辨於數如一命再命三命之類
是也制之而凡輿服宮室立爲科條莫不有多
寡之等使賤者不得以踰貴卑者不得以踰尊
所以防其僭擬凌逼之漸德以爲行行軌於德
如書所謂亦行有九德亦言其人有德乃言曰

載采采是也議之而凡名器祿秩設爲品級莫
不有黜陟之典使德之大者居上德之小者處
下所以防其玷混濫冒之端上下辨而民志定
賢才輔則天下治君子節天下之道所以執要
不煩也然而上行下效捷於影響凡王政之推
行而盡利鼓舞而盡神者皆其由已以及人者
也故節之道行乎天下而節之本在乎君身數
度德行不本君身言則其理終不備五服五章
在人之數度式玉式金君身自具數度焉敘賢
敘能在人之德行擬言議動君身實倡德行焉

帝王首出必先舉制之議之者端其本於身所
謂皇建其有極也而後以制之議之者達其用
於人所謂會其有極歸其有極也節之所以能
通而且清心寡慾之主在上則清明在躬志氣
如神以之制數度而制乃盡善以之議德行而
議乃咸宜尤節之所以無弊君子之體節者至
矣

周易

象曰中孚柔在內而剛得中說而巽孚乃化邦也

檢討臣萬松齡

程子曰二柔在內中虛爲誠之象二剛得上下
體之中中實爲孚之象

臣謹按易之爲書廣大悉備性命精微之旨具
載於中而六十四卦獨不言誠者何也在天成
象在地成形在人成性無非此真實之理所彌
綸而貫注故元亨爲誠之通利貞爲誠之復六
十四卦之不言誠正無一卦之不言誠也顧其

理之尤爲親切著明者莫過於无妄中孚无妄者純乎天而不雜乎人者也中孚者盡乎人以復乎天者也夫陰陽之道不過剛柔而吾心之理不過虛實朱子云一念之間中無私主謂之虛萬理俱備謂之實中孚之三四以柔在內是爲中虛惟其中虛所以受信也中孚之二五以剛得中是爲中實惟其中實所以爲信也實理充乎其內而外邪不得以入之則中孚之體於是乎立矣外邪旣不能入而虛明之本常惺不昧无思无爲而物來順應則中孚之用於是乎

行矣惟至虛乃爲天下之至柔惟至實乃爲天下之至剛雖有作用視聽言動其實無我我意猶無安得有僞是謂中孚孚在中也故老子亦曰真精之中其中有信也而又曰說而巽者何也卦體上巽下兌兌悅巽遜悅則和順而易從巽則漸漬而不迫蓋於穆不已人同得此以爲心原無一毫僞妄得以參於其內惟雜以有我之私則間隔矯強之形生矣中孚無我則和悅自生和悅旣生則矯僞不作上至誠以順巽於下有孚以說從其上故不期孚而自孚無往

御覽經史講義 卷七
不孚則無往不化雖萬邦之遠如堂陛然蓋萬物之性其天俱不容僞是以聖人在上鳥獸草木咸若何者其天同也物得其天未有不熙然而遊快然而育者雖豚魚亦且感格而於化邦乎何有誠以孚乃億兆人之本心有感之而無不應也然天下有一人未孚卽孚有一毫未到至孚乃化邦此卽夫子所謂脩己以安百姓皆性體之擴充非直事功之效驗也惟堯舜之主始足以語此豈漢唐之雜霸所可幾哉夫合天下之理而歸之於心合天下之心而歸之於孚

而毫無意必固我之私反之於天命之初殆無少虧缺此盡人以復乎天始克全其无妄之真體而天人相契之幾微矣故下曰中孚以利貞乃應乎天也然則中孚之道一誠而已矣乾之九三曰君子終日乾乾夕惕若厲无咎而夫子繫之以辭曰忠信所以進德脩辭立其誠所以居業忠信也誠也皆孚在中也則所以密致其功者亦唯是朝乾夕惕健行而不息則德益日進而業益日脩矣

後而業益日備矣
 也者亦即最時諱之則變而不可思慮益日
 而業忠節也斯也昔平春中出服也則當其
 樂之取補曰忠計也則以教諭辭補立其端也
 六三曰晉于濟曰其始也則其辭亦非而夫平
 代無平天也然則中平之數一始而身矣始之
 歸而天人昧矣之幾始矣始平曰中平以保良
 少則知此盡人以財平天破哀全其天矣之幾
 而寧無意必固非之味又之飲天命之厚於無

周易

君子以思患而豫防之

監察御史臣陳仁

臣謹按天下之患每生於所易忽而發於所不
 測故賢聖之君博觀今古窮極事理而是非較
 然夫天命靡常有治則有亂有安則有危然亂
 不生於亂而常生於治之時危亦不起於危而
 常起於安之日惟人主恃其久安而狃於常治
 不思所以豫防之於是亂生而危至矣自古天
 下治安而致禍亂者不可勝數姑不具論論其

最著者漢元帝遭世承平四夷嚮風然優游不
斷務爲姑息知蕭周之賢善善而不能用知恭
顯之奸惡惡而不能去賞罰倒置百度廢弛自
永光以來受制羣小賊害忠良西漢之衰決於
此矣隋煬帝坐承富強之業志驕氣盈慨然慕
秦皇漢武之爲人窮奢極欲兵連四夷政煩賦
重盜賊蜂起而猶巡遊不息惡聞直言天下怨
叛遂以滅亡唐明皇旣平內亂勵精圖治開元
之際幾致太平何其盛也及侈心一動怠於政
事殫耳目之玩窮聲色之巧奸臣執權艷妃亂

政南詔之敗冥然不知至於寵用聚斂之臣竭
天下以自奉致使祿山專以貨寶交結左右蒙
養奸慝其後乘輿播遷唐祚不絕如綫元順帝
當熙洽之餘忽盈成之戒荒於逸樂朝政日紊
是時羣雄割據四海鼎沸而帝猶不悟迎西番
僧行運氣之術教宮女作天魔之舞又於內苑
造龍船俱五采金裝日於後宮海子內遊戲荒
淫如此安得不亡由是觀之治極則亂安極則
危憂亂者其國常治恃安者其國常危此理之
必然者也向使四君者於其全盛之時皆能逆

探其未然之患而豫防之則至今可以不廢惟其履盛滿而不知戒或戒之而必待其著故禍發而不可救古之有天下者非以得位爲樂也日出而朝而惕然以思曰母役耳目與母殖貨利與母拒忠讜與日中而聽而凜然以思曰母邪臣進而正士消與母弋獵勤而遊幸多與母宮室崇讒夫昌女謁盛與日入而息而悚然以思曰母屑越於舞女酣歌與母耗志於蓬萊方丈與母刑法太密而詔令太繁與又進庶人而問之曰母饑寒切於肌膚而吏莫之省乎則怨

我者乎進士而問之曰母化不下究而積行之君子壅於上聞乎則謗我者乎進諸大夫而問之曰母尊卑濶絕而上下之情不通乎進諸將而問之曰母烽舉燧馳多壘於郊而檠戟不寧者乎凡此者非以爲苟勞也蓋恐一物之失理故事事而思之一事之失宜故時時而慮之慮之於無事之日而尋其端緒之所自起究其流弊之所必至以曲盡其防閑之術使不至於患也易曰安不忘危存不忘亡書曰制治於未亂保邦於未危此物此志也苟爲不然驕縱淫佚

徒取一時之快而不為異日之圖一旦馴致於覆敗禍亂無可奈何之地雖有聖人亦無能為矣是故君子之為國也欲祈天而永命必思艱以圖易

周易

六四繻有衣袽終日戒

監察御史 臣 甄之璜

程子曰當既濟之時以防患慮變為急繻當作濡謂滲漏也舟有罅漏則塞以衣袽有衣袽以備濡漏又終日戒懼不怠慮患當如是也

胡炳文曰乘舟者不可以無繻而忘衣袽亦不可謂衣袽已備遂愒然不知戒水浸至而不知則雖有衣袽不及施矣

臣謹按此周公欲占者處既濟之時宜預備而

戒懼以爲保邦之計也夫時當旣濟豐功赫奕
至德昭宣兆姓享樂利之休萬國集玉帛之會
人莫不謂已治已安而可無煩籌度矣乃公繫
四爻之辭丁寧示警旣曰繻有衣袽又曰終日
戒豈故爲是鯁鯁過計哉蓋統蒞衆則間端易
萌承平久而逸志或起須知有備無患王道之
良圖思患預防君子之遠慮故彌後患者當裕
之於先事撫大業者貴持之以小心使繻漏已
六形而始謀禦患之具則倉猝求之其勢必無及
矣抑衣袽有備而恃爲無恐之資則悠忽將之

其失仍不免矣惟時雖無患常恐患之或生而
所爲圖之務周儲之務早者預備旣不忽於尋
常變雖有備猶恐備之不密而所爲察之務謹
防之務嚴者戒懼復不忘於頃刻夫而後攸往
有利涉之功臨深無胥溺之害也四值旣濟之
時而爲坎體居近位其象固如是耳公意以爲
居安思危保至治於萬年者君與臣均有責焉
故綢繆未雨旣託爲鳥音以告其君而繻有衣
袽又繫爲爻辭以勗其臣君臣交勉儆戒無虞
周之所以傳世三十綿祚八百者其有賴於此

義也夫

此句與前文相承以見其前錄出交與紛紛如麻亂
對時雖未由諸指錄亂皆以告其謀而諸亦亦
則其以武知至命外萬年洛族典出改亦亦
和而為定歸鼠夜計其乘則時最宜之意以添
存而恐之改歸家無不謂之善也則時最宜之
則之善也無不謂之善也則時最宜之善也則
常與戰時歸國歸國之不歸而則時最宜之善也
則歸國之善也無不謂之善也則時最宜之善也
其火出不及矣則無不謂之善也則時最宜之善也

